

SOALAN NO. 130

PEMBERITAHUAN PERTANYAAN BAGI JAWAB BUKAN LISAN

MESYUARAT KETIGA, DEWAN RAKYAT

PENGGAL KELIMA, PARLIMEN KETIGA BELAS

MAJLIS MESYUARAT DEWAN RAKYAT

PERTANYAAN : JAWAB BUKAN LISAN

DARIPADA : DATO' HAJI MOHD ZAIM BIN ABU HASAN [PARI

TARIKH : 23 OKTOBER 2017 (ISNIN)

SOALAN :

Dato' Haji Mohd Zaim Bin Abu Hasan [Parit] minta MENTERI PEMBANGUNAN WANITA, KELUARGA DAN MASYARAKAT menyatakan sejauh manakah aplikasi pertama mudah alih bahasa isyarat Malaysia (MyBIM) yang dicipta oleh Persekutuan Orang Pekak Malaysia (MFD) dapat membantu masyarakat berkomunikasi dengan orang kurang upaya (OKU).

JAWAPAN: YB DATO' SRI ROHANI ABDUL KARIM, MENTERI PEMBANGUNAN WANITA, KELUARGA DAN MASYARAKAT

Tuan Yang Dipertua,

Aplikasi MyBIM yang dilancarkan pada 27 September 2017 telah dibangunkan oleh Persekutuan Orang Pekak Malaysia (MFD) dengan kerjasama Yayasan Sime Darby (YSD) untuk memberi pengetahuan asas kepada masyarakat mengenai Bahasa Isyarat Malaysia (BIM). Ia menyediakan media interaktif seperti gambar dan video sebagai alat bantuan pembelajaran kepada pengguna.

OKU pendengaran sering menghadapi masalah untuk mendapatkan perkhidmatan jurubahasa isyarat. Oleh itu, mereka sering berhadapan dengan pelbagai kesukaran untuk berkomunikasi. Aplikasi MyBIM yang lengkap dengan 500 kosa kata Bahasa Isyarat Malaysia dalam 36 kategori asas yang berbeza termasuk nama tempat, nombor, ucapan dan warna dapat memudahkan komunikasi antara OKU pendengaran dengan keluarga, rakan atau masyarakat sekeliling. Aplikasi ini juga dapat memberi

pendedahan kepada masyarakat tentang komunikasi asas dalam bahasa isyarat sekali gus mengurangkan tahap ketidakupayaan yang dihadapi OKU masalah pendengaran.

Tuan Yang Dipertua,

Aplikasi ini mampu memberi perkembangan positif dalam berkomunikasi bukan sahaja di kalangan OKU pendengaran Malaysia tetapi juga masyarakat umum yang ingin mempelajari bahasa isyarat. Aplikasi ini juga mudah diperolehi kerana boleh dimuat turun daripada *Apple App Store* dan *Google Play Store* secara percuma.

KPWKM akan sentiasa memberi sokongan dan komitmen kepada pihak swasta atau NGO yang tampil memperkenalkan produk atau perkhidmatan yang dapat membantu golongan OKU yang merupakan salah satu kumpulan sasar utama Kementerian. Ini dinyatakan dalam Seksyen 30 (3), Akta Orang Kurang Upaya 2008 yang menghendaki Kerajaan dan sektor swasta menerima semua cara dan format komunikasi yang boleh diakses mengikut pilihan OKU dalam urusan rasmi termasuk penggunaan Bahasa Isyarat Malaysia (BIM).